



**JUDICIAL SYSTEM MONITORING PROGRAMME
PROGRAMA MONITORIZASAUN SISTEMA JUDICIAL**

Komunikadu Imprensa

Periodu : Setembru 2011
Edisaun : 21 Setembru 2011

**Prokuradoria Jerál da Repúblika Organiza “Jornadas Juridicas” konabá
Implementasaun Artigu 118 no 125 KPP**

Iha loron 14 fulan Setembru tinan 2011, Minísteriu Públiku, organiza diskusaun “*Jornadas Juridicas*” hodi halibur instituisaun relevantes iha setór justisa no sosiedade sivíl atu hala`o diskusaun konabá implementasaun ba artigu 118 no artigu 125 Kódigu Prosesu Penál (KPP) ne`ebé ligadu ho implementasaun Lei Kontra Violénsia Doméstika. Prosesu diskusaun “*Jornadas Juridicas*” ne`e ho tópiku “Violénsia Doméstika no Valorizasaun ba Prova iha Krime Ekonomiku – Finanseirus”.

Objetivu sorumutu ne`e oinsá halibur ema hotu nia hanoin konabá atendementu legál ba vítima violénsia doméstika hodi asesu ba sistema justisa formál.

Diretór Ezekutivu JSMP, Luis de Oliveira Sampaio haktuir katak, *JSMP sente haksolok no orgullu tebes bele parstisipa iha eventu ne`e, no liu-liu hakarak apresia Prokuradora Jerál nia esforsu tomak atu hametin relasaun ho entidade hot-hotu konabá oinsa atu asegura prátika diak iha setór justisa.*

“Jornadas Juridica ne`e, nu`udar eventu importante ida no marka sentidu ida diferente teb-tebes tanbá eventu ne`e manifesta vontade, komitmentu no esperitu servisu kolektivu husi Minísteriu Públiku nian iha kontestu hametin justisa ba vítima violénsia bázeia ba jéneru nian. Ne`e hatudu katak Minísteriu Públiku nakloke-an atu rona no simu esperiensa husi organizasaun seluk konabá oinsa atu interpreta no aplika provizaun sira ne`ebé kria konfliktu iha nivel implementasaun.

Antes ne`e, JSMP dalabarak ona preokupa ho provizaun Artigu 125 KPP, ne`ebé dalabarak rezulta ka prezudika vítima violénsia doméstika sira. Partikularmente, eventu ne`e hatudu katak preokupasaun JSMP nian durante ne`e hetan reasaun/resposta pozitivu husi autóridade Minísteriu Públiku ne`ebé durante ne`e representa interese públiku atu asegura justisa ba vítima sira.

Tanbá ne`e, JSMP konsidera katak actividades ne`e sai nu`udar pasu importante ida ba ema hotu tanbá disponivel espasu/fo fatin ema barak atu fahe sira nia hanoin no esperiensa pratiku sira konabá saida mak durante ne`e sira enfrenta atu fó assisténsia ne`ebé mak diak liu ba vítima violénsia doméstika. JSMP mós hanoin katak importante tebes ba parte hotu bele integra didiak ho artigu 118 no 125 KPP.

Atividade refere partisipa no lidera diretamente husi Prokuradoria Jéral da República, Prokurador/a Distritál Díli, Baucau, Suai, no Oecusse nomós representante Defensória Públiku, Provedória Diretus Umanus no Justisa (PDHJ), Komisaun Anti Korupsaun (KAK), Sesaun Investitigasaun Kriminál no VPU Polísia Nasionál Timór Lésté, inklui Organizaun Sociedade Sivíl hanesan JSMP, Pradet, Fokupers, Asosiasaun Hak no Comição Justiça e Paz.

Matéria diskusaun ida ne'e, foka liu ba implementasaun Lei Kontra Violénsia Doméstika no dezafiu ne'ebé mak vítima sira hasoru iha prosesu formal, relasiona ho provizaun artigu 125 KPP ne'ebé mak aplika mós ba iha testemuña ne'ebé mak aumesmu tempu hanesan mós lezada. Preokupasaun ne'e mós mósu tanbá tuir lolos vítima ka lezada iha obrigasaun tuir lei prosesual atu hato'o nia deklarasaun bázeia ba artigu 118 KPP, la'os opsaun atu fo ka la fo deklarasaun bázeia ba provizaun artigu 125 KPP.

Aleinde ne'e iha oportunidade ne'e Prokuradoria Jéral da República husu ba partisipantes hotu atu hato'o sira nia preokupasaun ne'ebé mak durante ne'e sira enfrenta, relasiona ho aplikasaun artigu 125 KPP ba kazu violénsia doméstika.

JSMP mós aproveita hodi apresenta no subliña kestaun konabá kazu incestu, tanbá wainhira kazu hanesan ne'e akontese to iha tribunál vítima lakohi atu fó nia depoimentu bázeia ba artigu 125 KPP no tanbá ne'e arguidu sira absolvidu. Ba kestaun ida ne'e JSMP preokupa tanbá arguidu bele repete bei-beik hahalok kriminál ne'e tanbá intende katak vítima ne'ebé mak iha relasaun familia ho nia, sei la fo depoimentu hasoru nia iha tribunál.

Relasiona ho kestaun hirak ne'e, Prokuradora Jéral da República husu ba parte hotu atu bele marka prezensa iha diskusaun sira tuir mai, hodi bele apresenta dezafiu sira ne'ebé mak infrenta. Aleinde ne'e, Prokuradoria Jéral rasik rekoñese katak enkontru ne'e foin mak primera vez halo, no sei kontinua kada fulan ho asuntu ne'ebé mak diferente.

Tuir observasaun JSMP nian, diskusaun ne'e interesantes ba partes hotu ne'ebé partisipa, tanbá ema hotu bele hato'o duvidas ka preokupasaun sira ne'ebé durante ne'e sira infrenta, aleinde ne'e sira mós sente diskontente uituan tanbá persija mós atu hetan esklaresementu ka esplikaun no interpretaun ba artigu refere husi Juizes sira, maibe sira la marka prezensa.

Atu hetan informasaun kle'an, favor kontaktu:

Luis de Oliveira Sampaio

Diretur Exekutivu JSMP

Email: luis@jsmp.minihub.org

Landline: +670 3323883